



ÒRAIDICHE FOGHLAM THIDSEARAN (ÀRD-SGOIL)

Fios mun Dreuchd

A charaid/A bhanacharaid,

Tha sinn fìor thoilichte gu bheil sibh air ùidh a nochdadh anns an dreuchd Òraidiche Foghlam Thidsearan aig Sabhal Mòr Ostaig.

Anns a' phasgan seo, thathas air beagan fiosrachaidh a tharraing ri chèile airson blasad a thoirt dhuibh air na bhios a' dol aig a' Cholaiste agus air an t-seòrsa àrainneachd-obrach a tha againn. Tha 87 neach-obrach FTE sa Cholaiste agus tha eachdraidh làidir againn a bhith ag obair mar sgioba le dàimhean làidir agus feallsanachd cho-obrachail.

Tha mi an dòchas gun còrd na leanas ribh agus gum bi sibh airson ur n-iarrtas a thoirt air adhart chun na h-ath ìre. Ma tha ceistean sam bith agaibh no ma tha barrachd fiosrachaidh a dhìth oirbh faodar fios a chur gu Gwen NicGuaire gcl.smo@uhi.ac.uk.

Le deagh dhùrachdan,



An t-Oll. Marsaili Nicleòid
Stiùiriche an Fhoghlaim

mnl1.smo@uhi.ac.uk



SABHAL MÒR OSTAIG

IONAD NÀISEANTA CÀNAN IS CULTAR NA GÀIDHLIG

Tha Sabhal Mòr Ostaig, an t-Ionad Nàiseanta airson Cànan is Cultar na Gàidhlig, na ionad Gàidhlig bho bhun gu bàrr agus sinn a' tairgsinn chothroman ionnsachaidh, rannsachaidh agus cultarach a tha sàr mhath gus an urrainn do ar n-oileanaich, luchd-obrach agus luchd-compàirt a' Ghàidhlig a thoirt air adhart.

Stèidhichte ann an Slèite anns an Eilean Sgitheanach, 's e Sabhal Mòr Ostaig an aon ionad Foghlam Àrd-ìre is Leantainneach anns an t-saoghal a tha a' libhrigeadh a chuid phrògraman ionnsachaidh tro mheadhan na Gàidhlig a-mhàin ann an àrainn bhogaidh bheairteach.

Chaidh na ciad chùrsaichean goirid Gàidhlig a chumail an seo san t-Sultain 1973. San latha an-diugh, tha buaidh ar n-obrach a' sgaoileadh fada seachad air

crìochan an Eilein Sgitheanaich agus sinn a' tàladh mhiltean de dh'oileanaich à Alba agus co-dhiù 25 dùthchannan eile gach bliadhna.

Eadar cùrsaichean do luchd-tòiseachaidh is teisteanasan PhD; cùrsaichean goirid, pàirt-ùine no làn-ùine; ionnsachadh air làrach an ionaid no air astar: tha rudeigin ann dhan a h-uile duine aig Sabhal Mòr Ostaig. Tha foghlam bogaidh na bhunait dhan a h-uile rud a nì sinn mar an aon ionad foghlaim treas-ìre san t-saoghal a tha a' tairgsinn a chuid chùrsaichean gu tur sa Ghàidhlig.

AR LÈIRSINN

'S e ar lèirsinn, airson an ath chòig bliadhna, gum bi sinn nar sàr ionad Gàidhlig, a' tairgsinn chothroman ionnsachaidh, rannsachaidh agus cultarach a tha barraichte, gum faigh gach duine againn cothrom a bhith ealanta sa chànan agus sa chultar, agus sinn nar tosgairean dhan Ghàidhlig.



AR PRÌOMH AMASAN RO-INNLEACHDAIL

- **IONNSACHADH AIR LETH SÒNRAICHTE ANN AN GÀIDHLIG** - Cumaidh sinn oirnn a' togail coimhearsnachd smiorail Ghàidhlig - le luchd-labhairt misneachail, sgileil agus lèirsinneach a nì feum is diofar tron Ghàidhlig sna coimhearsnachdan is àiteachan-obrach aca.
- **RANSACHADH, SGOILEARACHD AGUS CO-PHÀIRTEACHADH EÒLAIS** - Cumaidh sinn oirnn a' dèanamh sàr obair rannsachaidh agus nì sinn feum nach beag dhan Ghàidhlig agus do choimhearsnachdan Gàidhlig tro rannsachadh is co-phàirteachadh eòlais a nì sinn ann an dòighean cruthachail is co-obrachail.
- **EALAIN IS CULTAR NA GÀIDHLIG** - Cumaidh sinn oirnn a' cur ris an inbhe againn mar phrìomh ionad airson Ealain is Cultar na Gàidhlig, le bhith a' toirt taic do dh'obair ùr le luchd-obrach agus oileanaich agus le bhith ag obair còmhla ri sàr luchd-ealain is luchd-cruthachaidh agus buidhnean ealain.
- **SEASMHACHD IS RIAGHLADH** - Cumaidh sinn oirnn a' cur ri seasmhachd ar n-obrach agus a' neartachadh ar structaran is modhan riaghlaidh mar bhuidhinn làidir, neo-eisimeilich Ghàidhlig.
- **AR N-ÀRAINNEACHD** - Bidh ar n-àrainneachd Ghàidhlig fhathast a' frithealadh air feumalachdan an luchd-cleachdaidh.
- **CO-CHONALTRADH IS COM-PÀIRTEACHAS** - Bidh sinn nar tosgaire is nar riochdaire ùghdarrasail is buadhach dhan Ghàidhlig: a' coileanadh ar rùin, a' co-phàirteachadh fiosrachadh le ar prìomh luchd-ùidhe, agus a' neartachadh coimhearsnachd Shabhal Mòr Ostaig.

AR LUACHAN

ÀRD-AMASACH:

'S ann le amasan àrda a bheir sinn stiùir is taic do chàch, agus sinn a' dèanamh nas urrainn dhuinn gus ar prìomh amasan a choileanadh, a chum maith na Gàidhlig a tha na cànan beò agus aig a bheil cultar brìghmhor.

BROSNACHAIL:

Bidh ar coimhearsnachd thaiceil, Ghàidhlig, sam faighear bogadh sa chànan, na h-adhbhar misneachd do ar n-oileanaich, luchd-obrach agus luchd-ùidhe.

CO-OBACHAIL:

Bidh sinn ag obair còmhla ri ar coimhearsnachdan is luchd-ùidhe gus na goireasan is am bun-structair a tha a dhìth a chruthachadh gus ar n-amasan coitcheann airson cànan is cultar na Gàidhlig a choileanadh.

DEALASACH:

Tha sinn air cur romhainn togail air mar a tha sinn air soirbheachadh mar an t-ionad Nàiseanta airson Cànan is Cultar na Gàidhlig agus sinn a' daingneachadh ar n-àrainneachd ionnsachaidh Ghàidhlig shònraichte, a' frithealadh air coimhearsnachdan Gàidhlig, agus a' togail bratach cànan is cultar na Gàidhlig.

FOSGAILTE:

Tha fàilte mhòr ron a h-uile duine aig Sabhal Mòr Ostaig; agus tha sinn fosgarra is soilleir nar conaltradh agus san dàimh a th' againn le daoine.

SEASMACH:

Tha sinn a' cuideachadh gus coimhearsnachdan seasmhach, Gàidhlig a chruthachadh, leithid coimhearsnachd na Colaiste fhèin, agus tha sinn ag atharrachadh ar modhan-obrach gus an ruig sinn cothromachadh-carboin.

CÙRSAICHEAN IS OILEANAICH

'S e colaiste ùr-ghnàthach a th' ann an Sabhal Mòr Ostaig agus tha i na com-pàirtiche acadaimigeach ann an Oilthigh na Gàidhealtachd 's nan Eilean. Tha goireasan ionnsachaidh air leth ann, leabharlann sònraichte, spèisealta, àiteachan-fuirich air an àrainn agus ionad cùraim chloinne faisg air làimh.

Tha còrr is 250 oileanach clàraichte air cùrsaichean foghlaim àrd-ìre againn ann an 2024-25 agus còrr is 300 oileanach ag ionnsachadh Gàidhlig air astar air a' Chùrsa Inntrigidh. Bidh na Cùrsaichean Goirid a' ruith tron bhliadhna, an dà chuid air-loidhne agus air làrach an t-Sabhail aig àm na Càisge agus tro mhiosan an t-Samhraidh, nuair a gheibh faisg air 800 neach taic, teagasg agus oideachadh sa Ghàidhlig agus ann an ceòl, seinn is cultar na Gàidhlig. 'S ann à Alba agus às an Rìoghachd Aonaichte a bhios a' mhòr-chuid, ach bidh oileanaich a' tighinn thugainn às na Stàitean Aonaichte, dùthchannan Eòrpach agus Àisia cuideachd. Tha e àbhaisteach gum bi co-dhiù fichead dùthaich air an riochdachadh am measg oileanaich an t-Sabhail sa bhliadhna.

Tha luchd-ceumnachaidh an t-Sabhail air a dhol air adhart gu dreuchdan Gàidhlig ann an iomadach gnìomhachas, a' cur an sgilean gu feum ann an leasachadh a' chàin. Tha còrr is 1,500 ceumnaiche air tighinn tro dhorsan na Colaiste, bhon a thòisich na cùrsaichean àrd-ìre ann an 1985.

Foghlam Adhartach

Cùrsaichean Goirid - Gàidhlig (gach ìre) agus Ceòl (measgachadh)
An Cùrsa Inntrigidh - do luchd-tòiseachaidh air astar
Preantasachd Stèidheachaidh anns na Meadhanan Didseatach
Preantasachd Stèidheachaidh ann an Seirbheisean Sòisealta (Clann is Daoine Òga)
SVQ 2 ann an Seirbheisean Sòisealta (Clann is Daoine Òga)
SVQ 3 ann an Seirbheisean Sòisealta (Clann is Daoine Òga)

Foghlam Àrd-ìre

Teisteanasan Foghlaim Àrd-ìre

CertHE An Cùrsa Adhartais - do luchd eadar-mheadhanach air astar
CertHE An Cùrsa Comais - do luchd eadar-mheadhanach (làrach)
CertHE Gàidhlig is Conaltradh - bliadhna càin do dh'fhileantaich (làrach)
Dioplòma Foghlaim Àrd-ìre (Diop HE) anns na Meadhanan Gàidhlig
Dioplòma Foghlaim Àrd-ìre (Diop HE) ann an Gàidhlig is Cuspairean Co-cheangailte

Ceumannan

BA (Urr) Gàidhlig
BA (Urr) Gàidhlig le Leasachadh
BA (Urr) Gàidhlig is Ceòl
BA Urr Gàidhlig is Foghlam (teisteanas teagaisg na lùib)

For-cheumannan

PGDE (Slighe Ghàidhlig - Bun-sgoil agus Àrd-sgoil)
MSc Cultar Dùthchasach is Eachdraidh na Gàidhealtachd
PDA Eadar-theangachadh Gàidhlig
MEd. Foghlam Gàidhlig
Cothroman MRanns agus PhD

COIMHEARSNACHD RANNSACHAIDH SHABHAL MÒR OSTAIG

Tha àite cudromach aig Sabhal Mòr Ostaig ann an ath-bheothachadh cànanach agus cultarach na Gàidhlig ann an Alba. Tha cliù eadar-nàiseanta againn airson a bhith a' sgrùdadh eachdraidh agus litreachas na Gàidhlig, an-dè agus an-diugh; airson rannsachadh air taobhan poilitigeach, foghlaim agus coimhearsnachd de dh'ath-bheothachadh mhion-chànanan; agus airson a dhol an sàs ann an ealain chruthachail Ghàidhlig agus ann am meadhanan craolaidh agus air-loidhne.

Ionad Sàr-mhathais ann an Teagasg (ISMT)

Tha Sabhal Mòr Ostaig a' riochdachadh Foghlam Gàidhlig mar phrìomh ionad air a' phròiseact *Ionad Sàr-mhathais ann an Teagasg (ISMT)* ann an co-bhonn ri Oilthigh Ghlaschu. Mairidh am pròiseact cudromach seo ann an ionnsachadh proifeiseanta agus cothroman rannsachaidh do thidsearan gu, co-dhiù, Am Màrt 2026.

Pròiseactan Nàiseanta Eile

Tha Sabhal Mòr Ostaig na dhachaigh do ghrunn phrìomh phròiseactan ro-innleachdail ceangailte ris a' Ghàidhlig agus grunn phrògraman co-cheangailte ri leasachadh ghoireasan. Tha e na dhachaigh don phròiseact eadar-oilthigh Faclair na Gàidhlig, Ainmean-Àite na h-Alba, agus Tobar an Dualchais. Tha sinn cuideachd nar com-pàirtiche ann an SpeakGaelic agus grunn phròiseactan cudromach nàiseanta is eadar-nàiseanta eile le fòcas air leasachadh mhion-chànanan, ionnsachadh cànan le taic coimpiutair, leasachadh coimhearsnachd agus ealain mhion-chànanan.

Tha an ro-innleachd rannsachaidh is buaidh againn ag amas air togail air a' chliù rannsachaidh àrd-ìre a tha againn agus gun lean sinn oirnn a' cur prìomhachas air gnìomhan rannsachaidh a leasaicheas tuigse agus mothachadh air cànan, cultar agus dualchas na Gàidhlig.

Tha cothroman trèanaidh agus leasachaidh aig luchd-obrach a tha an sàs ann an rannsachadh, a bharrachd air cothroman air comhairleachadh, maoineachadh agus saorsa bho dhleastanasan eile airson gnìomhan rannsachaidh a dhèanamh, le taic tro Mhaoin Leasachaidh Luchd-obrach Shabhal Mòr Ostaig agus Maoin Cho-labhairtean agus Maoin Shiubhail OGE. Bidh sinn a' cumail sreath de cho-labhairtean rannsachaidh gu cunbhalach far am bi an luchd-obrach againn fhèin agus luchd-tadhail agus oileanaich fhor-cheumnach a' taisbeanadh an cuid obrach.

ÀRAINNEACHD BHEOTHAIL

'S e ionad ionnsachaidh beothail, adhartach a th' ann an Sabhal Mòr Ostaig, a bhios ag amas air coimhearsnachd Ghàidhlig làn misneachd is soirbheachais a bhrosnachadh. Tha iomadh pròiseact agus buidheann stèidhichte air làrach na Colaiste (faicibh an liosta gu h-ìosal), agus bithear a' cumail iomadh tachartas ionadail ann cuideachd.

Tha iomadh togalach againn air an làraich agus bidh buidhnean is pròiseactan stèidhichte againn a' dearbhadh cho cudromach 's a tha com-pàirteachas ann an saoghal na Gàidhlig agus mar a tha a' Cholaiste cuideachd a' cumail taic ri gnìomhachasan anns an sgìre fhèin.

Pròiseactan (far a bheil com-pàirt aig a' Cholaiste)

Faclair na Gàidhlig

Ainmean-Àite na h-Alba

Tobar an Dualchais

Ionad Sàr-mhathais ann an Teagasg

Luchd-màil nan Oifisean

Young Films – Companaidh film

Dualchas – Ailtirean



PRÒGRAMAN FO-CHEUM AGUS FOR-CHEUM AIG SABHAL MÒR OSTAIG

Tha Sabhal Mòr Ostaig a' tabhann grunn chùrsaichean fo-cheum agus for-cheum, air astar agus air an àrainn, le modalan spèisealta ann an cànan, leasachadh agus poileasaidh cànan, litreachas, dualchas, na meadhanan, foghlam, ceòl traidiseanta agus eadar-theangachadh. Tha na goireasan leabharlainn agus tasglainn againn a' sìor-fhàs, agus a' tarraing àireamh nas motha de dh'oileanaich fhor-cheum. Bha sinn riamh èasgaidh gu frithealadh air feumalachdan foghlaim na Gàidhlig, agus tha sin air aithneachadh san inbhe a tha againn mar Ionad Nàiseanta Cànan is Cultar na Gàidhlig. Bha sinn aig teis-meadhan nan oidhirpean a thug Oilthigh na Gàidhealtachd is nan Eilean gu buil. Ann an 2023, chomharraich sinn 50 bliadhna de Shabhal Mòr Ostaig agus tha sinn ag obair air planaichean airson inbhe Shabhal Mòr Ostaig mar Ionad Nàiseanta Cànan is Cultar na Gàidhlig a neartachadh.

Cùrsaichean Fo-cheuma

Tha na trì ceumannan BA/BA le Urram ann an Gàidhlig, Gàidhlig agus Ceòl agus Gàidhlig & Foghlam ag obair còmhla ann an 'sgeama', a' tòiseachadh le 'bliadhna cànan' (le cùrsaichean fa leth aig SCQF ìre 7 do luchd-ionnsachaidh, oileanaich a tha fileanta ann an Gàidhlig, agus oileanaich air astar). An-dràsta tha na prògraman seo a' gabhail a-steach litreachas bhon 21mh linn, dualchas agus beul-aithris, eachdraidh na Gàidhlig is na Gàidhealtachd, ainm-eòlas, ceòl traidiseanta, eòlas cànan, eòlas foghlaim, sgilean rannsachaidh agus sgilean eadar-theangachaidh. Tha an teagasg air BA (le Urram) Gàidhlig agus Foghlam a' cur fòcas sònraichte air foghlam bogaidh agus dòighean-teagaisg iomchaidh airson àrainneachd bhrosnachail Ghàidhlig a stèidheachadh san sgoil. Tha àrainneachd na Colaiste a' cur gu mòr ris an fheallsanachd seo. Chuireamaid fàilte air tagraichean a tha air a bhith an sàs gu mòr ann an ro-innleachdan sònraichte a thaobh Foghlam Gàidhlig aig ìre ionadail no ìre nàiseanta.

Cùrsaichean For-cheuma

A bharrachd air oileanaich rannsachaidh PhD, tha cùrsaichean for-cheuma againn - MSc ann an Cultar Dùthchasach & Eachdraidh na Gàidhealtachd, Maighstireachd Rannsachaidh ann an Gàidhlig is Ceiltis, MEd ann am Foghlam Gàidhlig, agus PGDE ann am Foghlam (Bun-sgoil, Gàidhlig mar chuspair san àrd-sgoil agus cuspairean tro mheadhan na Gàidhlig san àrd-sgoil). Bhiodh an tagraiche soirbheachail a' cur ris na prògraman Foghlaim ann a bhith a' cumail taic ri oileanaich ann an sgoiltean agus a bhith a' teagasg oileanaich air astar air-loidhne, a rèir an eòlais fhèin. Thathar an dùil gum biodh an tagraiche soirbheachail cuideachd a' cur ri MEd ann am Foghlam Gàidhlig, a rèir eòlais.

Tha sinn cuideachd air cùrsaichean for-cheuma a thabhann ann am foillseachadh agus ann an eadar-theangachadh.

FIOS MUN DREUCHD

ÒRAIDICHE FOGHLAM THIDSEARAN
(ÀRD-SGOIL)



Tha Sabhal Mòr Ostaig a-nise aithnichte mar ionad sònraichte ann am Foghlam Thidsearan Gàidhlig. Tha sgioba ghleusta stèidhichte aig Sabhal Mòr Ostaig a tha a' cur ri Foghlam Thidsearan aig ìre fo-cheum agus for-cheum, agus iad a' cruthachadh chothroman ann an ionnsachadh proifeiseanta do thidsearan agus ag obair ann an com-pàirteachas ri sgoiltean airson ùidh a bhrosnachadh ann an Gàidhlig am measg sgoilearan. Tha Sabhal Mòr Ostaig an-dràsta a' sireadh thagraichean mu choinneimh na dreuchd, Òraidiche Foghlam Thidsearan air cùmhnannt maireannach. Bidh an obair teagasg stèidhichte gu ìre mhòir air làrach na Colaiste, le sùbailteachd a bhith ag obair air astar aig amannan eile den bhliadhna. Bidh an neach soirbheachail a' cur gu mòr ri teagasg agus buaidh, a' gabhail a-steach dealbhadh is libhrigeadh, chùrsaichean aig ìre ro-Urram, Urram (BA (le Urram) Gàidhlig agus Foghlam), PGDE (Slighe Ghàidhlig) agus MEd ann am Foghlam Gàidhlig, a rèir eòlais. Tha sinn a' cur fàilte air iarrtasan airson na dreuchd seo bho thagraichean uidheamaichte aig a bheil sàr eòlas ann an teagasg ann am Foghlam Gàidhlig agus ùidh ann an obair làn-ùine - chuireamaid fàilte air iarrtasan airson obair pàirt-ùine cuideachd. Feumaidh làn-chlàradh GTCS a bhith aig tagraichean aig ìre na h-àrd-sgoile le deagh eòlas air teagasg Gàidhlig (luchd-ionnsachaidh agus fileantaich). Bhiodh e na bhuannachd, ach chan eil e riatanach, nam biodh eòlas aig tagraichean air

cuspair(ean) a theagasg tro mheadhan na Gàidhlig cuideachd.

'S e cothrom air leth a tha seo airson taic a chumail ri ginealach ùr de thidsearan Gàidhlig agus a bhith a' co-obrachadh ann an sàr sgioba air àrainneachd bhrosnachail, dhùbhlanach is luachmhor, tro mheadhan na Gàidhlig. Bhiodh eòlas air teagasg aig ìre fo-cheum feumail, ach chan eil e riatanach.

Bidh thu a' teagasg air a' chùrsa PGDE Slighe Ghàidhlig Àrd-sgoile agus air modalan fa leth am broinn nan cùrsaichean foghlaim eile, leithid Ag Amas air Teagasg 1, Clann agus an Ionnsachadh agus modalan ann am practas proifeiseanta, far am bi thu a' cumail taic ri, agus a' tadhal air, oileanaich air greisean-sgoile ann an clasaichean Gàidhlig air feadh na dùthcha. Bidh cothrom ann a bhith ag obair mar phàirt den sgioba airson modalan a leasachadh, ionnsachadh proifeiseanta a thoirt do thidsearan agus a bhith an sàs ann an ro-innleachdan gus ùidh a bhrosnachadh ann an teagasg Gàidhlig am measg sgoilearan. Bidh e comasach dhut a dhol an sàs gu h-èifeachdach ann an teagasg aghaidh-ri-aghaidh agus air-loidhne, agus a bhith ag adhartachadh ionnsachadh do dh'oileanaich teagaisg tro mheadhan na Gàidhlig, a' gabhail a-steach leasachadh cànan agus eòlas air modhan-teagaisg ann am foghlam bogaidh.

TUAIRISGEUL OBRACH	
DREUCHD	Òraidiche ann am Foghlam Thidsearan (Àrd-sgoil)
UAIREAN OBRACH	Làn-ùine – 1.0FTE (35 uairean/seachdain) [coimheadaidh sinn air tagraidhean airson obair pàirt ùine cuideachd]
CÙMHNANT	Maireannach
ROINN	Roinn an Fhoghlaim
FO STIÙIR	Stiùiriche Foghlam Thidsearan
ÌRE TUARASTAIL	Sgèile Nàiseanta Òraidichean Cholaistean: £40,170 - £48,357 pro rata (£41,833 - £50,359 bho 1 Sultain 2025)
PRÌOMH ÀITE-OBACH	Slèite, Sabhal Mòr Ostaig
CEANN-LATHA	5.00f, 22 An t-Ògmhios 2025
AGALLAMHAN	An dùil gun tèid agallamhan a chumail 1 An t-luchar 2025

RÒ-RÀDH

Thòisich an ceum BA (le Urram) Gàidhlig agus Foghlam aig Sabhal Mòr Ostaig ann an 2017, mar chùrsa do thidsearan àrd-sgoile is bun-sgoile, luchd-ionnsachaidh agus fileantaich. Aig an àm ud, chaidh na h-oileanaich an sàs ann an clasaichean foghlaim agus greisean-sgoile bhon treas bliadhna air adhart. Bhon uair sin, tha structar a' chùrsa air atharrachadh gu cùrsa ceithir bliadhna, le modalan foghlaim agus greisean-sgoile aig gach ìre den cheum. Tha an sgioba air fàs bhon uair sin cuideachd agus an-diugh, a bharrachd air BA (le Urram) Gàidhlig agus Foghlam, tha Sabhal Mòr Ostaig an sàs gu mòr ann am PGDE (Slighe Ghàidhlig) do dh'oileanaich àrd-sgoile agus bun-sgoile agus ann am MEd Foghlam Gàidhlig – ceum cudromach aig ìre for-cheum ann an ionnsachadh proifeiseanta do thidsearan clàraichte. Tha Sabhal Mòr Ostaig cuideachd na phrìomh ionad anns a' phròiseact nàiseanta Ionad Sàr-mhathais ann an Teagasg a bhios a' tabhann chothroman ann an ionnsachadh proifeiseanta agus rannsachadh do thidsearan air feadh na dùthcha.

PRÌOMH AMAS NA H-OBACH

Tha sinn a' sireadh Òraidiche a bhios a' teagasg mhodalan àrd-ìre do dh'oileanaich teagaisg tro mheadhan na Gàidhlig air an làraich agus air astar, agus ag eagrachadh agus ag ath-bhreithneachadh phròiseasan teagaisg, measaidh agus rianachd co-cheangailte ri prògraman fo-cheum agus for-cheum Foghlaim aig Sabhal Mòr Ostaig. Bidh sibh ag obair ann an com-pàirteachas ri sgoiltean gus oileanaich ullachadh airson dreuchd ann an teagasg ann am Foghlam Gàidhlig aig ìre bun-sgoile agus àrd-sgoile.

PRÌOMH DHLEASTANASAN AGUS UALLAICHEAN

Teagasg agus Ionnsachadh

- A' cur ri **libhrigeadh teagaisg, planaigh, stiùiridh agus measaidh**, ann am prògraman Foghlaim fo-cheum is for-cheum air prògraman do dh'oileanaich foghlaim thidsearan (làrach agus astar).
- A' stiùireadh tràchdasan fo-cheum is for-cheum, a rèir eòlas.
- A' leasachadh stuthan-teagaisg agus dhòighean measaidh a thèid a chleachdadh air prògraman do dh'oileanaich foghlaim anns a' Ghàidhlig.
- A' cuideachadh le greisean-sgoile air na prògraman Foghlaim agus a' tadhal air oileanaich ann an sgoiltean a rèir modhan nàiseanta agus dòigh-obrach roinn Foghlaim na Colaiste.
- A' ceartachadh mheasaidhean fòrmatach agus deireannach air na diofar mhodalan anns am bithear an sàs agus ag obair ann an co-bhonn ri luchd-sgrùdaidh bhon taobh a-muigh gus càileachd a dhearbhadh.
- A bhith a' gabhail pàirt ann an siostaman deagh-ghnè agus fèin-luachaidh airson modalan agus cùrsaichean fa leth.
- A' leasachadh dòighean èifeachdach air teicneòlas ionnsachaidh a chleachdadh ann an libhrigeadh a' chùrsa, eagrachadh a' chùrsa, ais-mholaidhean agus measadh.
- A' dèanamh cinnteach gum bi dòigh-obrach in-ghabhalach agus stèidhichte air fianais ann a bhith a' comasachadh ionnsachadh ann an raon de chruthan aghaidh ri aghaidh agus air-loidhne leithid clasaichean oideachaidh, òraidean, ionnsachadh stèidhichte air duilgheadasan, a bhrosnaicheas com-pàirteachadh nan oileanach agus coileanadh builean ionnsachaidh.
- A bhith a' cumail taic ri leasachadh proifeiseanta nan oileanach a rèir riatanasan nàiseanta ann am foghlam agus riatanasan sònraichte ann an Gàidhlig.

RIANACHD

- A' cumail **comhairle is taic ri oileanaich**. Bidh Comhairlichean Acadaimigeach Pearsanta aig gach oileanach, agus bidh coinneamh aca leibh turas gach semeaster.
- A' leasachadh **dàimhean-obrach èifeachdach le oileanaich** agus, ann an com-pàirteachas le seirbheisean oileanach, dèiligeadh ri feumalachdan sònraichte no suidheachaidhean measgaichte a chuireas luach ann an diofar dhòighean ionnsachaidh.
- A bhith a' gabhail pàirt ann an **coinneamhan** sgioba, coinneamhan roinne, coinneamhan Sgeama agus ann an tachartasan iomchaidh co-cheangailte ri amasan agus dleasan na h-obrach.
- A' gabhail pàirt ann an gnìomhan co-cheangailte ri **trusadh oileanach** (m.e. làithean fosgailte) agus **inntrigeadh**.



EILE

- A' leasachadh dàimhean le luchd-ùidh air an taobh a-muigh, a' cur ri obair is inbhe na Colaiste agus a' taisbeanadh sàr-mhaitheas agus cothroman co-obrachaidh.
- A' dol an sàs ann an gnìomhan leasachadh proifeiseanta leantainneach mar a bhios iomchaidh.
- A' cur ri àrainneachd rannsachaidh na Colaiste a thaobh Foghlam Gàidhlig, far am biodh seo iomchaidh.
- A' cur ri àrdachadh iomhaigh eadar-nàiseanta na Colaiste a rèir a' Phlana Ro-innleachd.
- A bhith a' cur ri poileasaidh cànan na Colaiste agus a bhith a' gabhail pàirt ann an iomairtean gus àrainneachd Ghàidhlig na Colaiste a neartachadh.
- Dleastanasan iomchaidh sam bith eile mar a thèid iarraidh le Manaidsear/Stiùiriche an Fhoghlaim.

Seo tuairisgeul air an obair mar a tha i. Sa chumantas thèid beachdachadh air seo bho àm gu àm gus dèanamh cinnteach gu bheil e iomchaidh agus gus atharrachaidhean sam bith a dhèanamh. Thèid seo a dhèanamh leis an neach-obrach agus le manaidsear agus mar sin thathas a' sùileachadh gun gabh sibh pàirt anns na còmhraidhean seo. Tha Sabhal Mòr Ostaig ag iarraidh gun gabh cùisean aontachadh leis gach neach ach far a bheil seo do-dhèante, tha còraichean aig Sabhal Mòr Ostaig air atharrachaidhean ciallach a dhèanamh a rèir tuarastal an neach-obrach às dèidh bruidhinn ris/rithe mun chùis.

Ceann-là: 06/06/2025

COMASAN AN NEACH-OBRACH

Tha sinn a' sireadh Òraidiche air leth ealanta is dealasach aig a bheil eòlas aig ìre fhreagarraich a tha a' coileanadh shlatan-tomhais an tuairisgeil obrach seo, agus aig a bheil na comasan a leanas:

	RIATANACH	NA BHUANNACHD
Teisteanasan agus trèanadh proifeiseanta	Fo-cheum no Ceum le Urram ann an cuspair iomchaidh Teisteanas teagaisg aig ìre àrd-sgoile Làn-chlàradh aig GTCS	Eòlas air ceannas ann am Foghlam Gàidhlig
Eòlas	Eòlas teagaisg agus dearbhadh air a bhith a' cur ri Foghlam Gàidhlig aig ìre àrd-sgoile agus anns an fharsaingeachd aig ìrean eile Comas dearbhte air modhan-teagaisg ann am foghlam bogaidh agus dòighean-ionnsachaidh agus measaidh aig ìre sgoile Ag adhartachadh agus a' cur an cèill lèirsinn airson Foghlam Gàidhlig aig ìre sgoile agus An Treas Ìre Taic do dh'oileanaich mar Chomhairliche Acadaimigeach Pearsanta (no coltach ris) Cleachdte ri teagasg air-loidhne is ri bhith a' dèanamh feum de dh'àrainneachd ionnsachaidh air-loidhne (VLE)	Comas dearbhte air modhan-teagaisg cànan agus leasachadh cànan Eòlas air cuspair(ean) a theagasg tro mheadhan na Gàidhlig Deagh eòlas air leasachaidhean aig ìre nàiseanta ann am Foghlam Gàidhlig Eòlas air teagasg aig ìre fo-cheum Eòlas air a bhith an sàs ann an rannsachadh

	RIATANACH	NA BHUANNACHD
Sgilean	Fileantachd sa Ghàidhlig a thaobh labhairt, leughadh agus sgrìobhadh Comas dearbhte a thaobh a bhith a' dealbhadh, ag ath-sgrùdadh agus ag adhartachadh phrògraman ionnsachaidh, teagaisg agus measaidh Sgilean math rianachd agus comasan eagrachaidh gun stiùiridh Clàr-obrach follaiseach a thaobh a bhith an sàs ann an ionnsachadh proifeasanta leantainneach fhèin Comas sgilean a nochdadh ann am Microsoft Office airson teagasg agus rianachd	Eòlas ann an leasachadh agus taisbeanadh dhòighean-teagaisg is rannsachaidh agus a' dealbhadh mhodalan agus mhodhan-obrach Comas a thaobh teagasg air-loidhne (me. MS Teams, Moodle, Brightspace)
Comasan Pearsanta	Deònach agus comasach a bhith a' siubhal gus tadhal air sgoiltean air feadh na dùthcha nuair a bhios feum air Comas obrachadh ann an sgioba	



UAIREAN-OBACH

Làn-ùine – 35 uairean san t-seachdain

Pàirt-ùine – ri dhearbhadh

SAOR-LÀITHEAN

Làn-ùine – 50 làithean (a’ gabhail a-steach saor-làithean poblach)

Pàirt-ùine – ri dhearbhadh

SGÈILE TUARASTAIL:

Sgèile Nàiseanta Òraidichean Cholaistean: £40,170 – £48,357 a rèir eòlais (£41,833 – £50,358 bho 1 Sultain 2025)

Thèid tuarastal a phàigheadh a-steach gu cunntas banca air an latha-obrach mu dheireadh dhen mhios.

Tha sgeama pheinnseanan aig a’ Cholaiste a tha fosgailte don luchd-obrach air fad.

Nì gach neach-obrach Measadh-obrach Bliadhnail còmhla ris a’ Mhanaidsear aca gus cuideachadh le bhith a’ dèanamh cinnteach gum bi seirbheisean sàr-mhath againn, agus gus feumalachdan trèanaidh luchd-obrach a chomharrachadh agus taic a thoirt dhaibh le leasachaidhean pearsanta.

Tha Sabhal Mòr Ostaig ag amas air taic shònraichte a thoirt dhuibh gus na sgilean cànan agad a leasachadh agus thèid cothroman sònraichte ionnsachaidh a thabhann dhuibh ri linn seo.

CÀITE? WHERE?

ALBA
SCOTLAND

AN T-EILEAN SGITHEANACH
ISLE OF SKYE



SABHAL MÒR OSTAIG



WWW.SMO.UHI.AC.UK



Sabhal Mòr Ostaig, Ostaig, Slèite, An t-Eilean Sgitheanach IV44 8RQ
01471 888 000 / iarrtas@smo.uhi.ac.uk



SABHAL
MÒR
OSTAIG

Tha Sabhal Mòr Ostaig na charthannas clàraichte an Alba
SC002578

